



iRS - indipendentzia Repùbrica de Sardigna  
**INDIPENDENTISTAS**

## Lenardu Álagon

Su de bàtoro e ùrtimu marchesu de Aristanis e Conte de Gocèano. Nàschidu in Aristanis in su 1436 dae Don Artale Álagon y Luna, e Donna Benedita Cubello.

Lenardu Àlagon dae zovanu aiat istudiadu in sa corte de sa corona aragonesa e partetzipadu a gherras po sos Aragonesos, comente cheriat don Artale. In su 1457 cojat Maria Morillo y Linan, una fèmina nòbile ispagnola.

In su 1470 apustis de sa morte de su tiu, erede de sos Arborea, Sarbadore Cubello, chi non teniat fizos, Lenardu diventat marchesu de Aristanis e Conte de Gocèano.

Nicolò Carroz viceré de Sardigna e filoaragonesu, non bidiat bene custa ereditade. Si narat chi sa disamistade intra su viceré e Lenardu est incumintzada candho sa fiza de su marchesu, Eleonora, non est istada

cojada cun Dalmazzo Carroz, fizu de su viceré. Su chi però no andhait bene a Carroz fit su podere chi fit leandhe Álagon e cheriat chi totu su patrimoniu de sos Cubellos andherat in su demàniu de sa corona.

Nicolò Carroz aiat segadu sos patos e sas lezes chi galentiant a Lenardu sa paghiosa propiedade de sos istados suos, gai in su 1470 incumintzat sa gherra. Álagon chi ischiat cantu balente fit, si ponet a conca de un esèrcitu de sardos torrando a allùere su sentidu natzionale mai istudadu, suguzandhe su populu a bisare un'isola libera in nùmene de s'Arborea.

Sos esèrcitos s'affrontant in Uras, sa batàglia est tosta e s'esèrcitu de su marchesu ndhe bessit binchidore, cunstringhinde sos aragonesos a si cuare in Casteddu, apustis, sos sardos si torrante a leare sos casteddos de Monreale e Sedhori.

In su 1474 si ponet paghe intra Lenardu Álagon e sa Corona aragonesa chin sa paghe de Urgelles, inue Lenardu est reconnotu comente lezìtimu marchesu de Aristanis dae su Re Zuanne Chene Fede. Su viceré però orioladu dae custa detzisione partit in Barcellona e cumbinchet a Zuanne II a cundennare Álagon e totu sa famiglia sua a morte po traighimentu.

Si torrat gai a leare sas armas, s'esercitu aragonesu si che faghet prus forte batìndendhe sordados dae sa Sicìlia, chin Álagon bi sunt su frade Sarbadore, sos fizos Artale e Ludovico, Zuanne Dessena Visc. de Sedhori, Lenardu de Tola, Ánghelu Cano, Serafino de Montagnans, Brancaccio Manca e medas àteros volenteris sardos (3000 òmines

sigundu G.Zurita 1512-1580). Su manzanu chito de su 19 Màju de su 1478 in Campu Castigadu, a cara de Macumere, inue fint aisetandhe sos sardos, incumintzat sa famada batàglia. Su primu atacu est de s'esèrcitu de Álagon, ghiadu dae Artale, chi, ingannadu dae sa tàtiga de sos aragonesos, los creiat fuindhe. Su sàmbene faladu in cussos terrinos fit meda e fintzas Artale bi lassat sa pedhe. Lenardu est custrintu a fuire in mare dae Bosa ma benit caturadu e impresonadu in sa presone polìtiga de Jativa in Valenza, inue che morit in su 1490. In su 1518 sas cortes de Saragoza declaraint Lenardu Álagon chena neghe, oprimidu e votaint sa torrada de sas terras leadas dae s'Aragona.